

每週經課朗誦經文(巴克禮台語漢字)2014/03/02

共同經課 - 1 出埃及記二十四章十二節~十八節

12 耶和華給摩西講：「你上山就近我，踎佇遮，我欲將石碑及律法以及誠命，我所寫的賞賜你，通教示in。」13 摩西及跟隨伊的約書亞起來，摩西上上帝的山。14 給長老講：「恁踎遮等阮，聽候阮倒轉來恁遮，看啊，亞倫、戶珥及恁佇啲。人若有代誌，通來尋in。」15 摩西上山，山有雲遮蓋。16 耶和華的榮光停佇西奈山；雲遮伊六日久，第七日伊對雲中叫摩西。17 耶和華榮光的款式，親像火燒佇山頂，以色列人親目看見。18 摩西入雲中上山，摩西佇山頂四十日四十暝。

共同經課 - 2 詩篇九十九篇

1 耶和華做王；列邦著愕愕！伊坐佇基路兵，地著搖動。2 耶和華佇錫安做大；伊搬(pôaⁿ)過佇萬百姓的頂面。3 in著謳啉你大閣通驚畏的名；伊是至聖！4 王有氣力，歡喜公平，你互正直堅固，佇雅各中行公平及義理。5 恁著尊重耶和華——咱的上帝，佇伊腳踏椅的頭前跪拜。伊是至聖！6 佇伊的祭司中有摩西及亞倫；佇求叫伊的名的的人的中間有撒母耳。in求叫耶和華，伊就聽in。7 伊佇雲柱的中間對in講話；in遵守伊干證的話及伊所賞賜in的律法。8 耶和華——阮的上帝啊，你有應in；你雖然照in的所行報應in，猶久你是赦免in的上帝。9 恁著尊重耶和華——咱的上帝，佇伊的聖山跪拜，因為咱的上帝——耶和華是至聖！

共同經課 - 3 彼得後書一章十六節~二十一節

16 因為阮平素互恁知咱的主耶穌基督的權能及伊的降臨，毋是用奇巧無影跡話，就是親目看見伊的大威嚴。17 因為伊對父上帝得著尊貴榮光，彼時對極大的榮光有此號聲，到佇伊講：「此個是我疼的子，我所歡喜的。」18 此個聲對天出，阮及伊佇聖山的時聽見。19 閣咱有先知的話會閣卡堅固，恁致意諸個是好，親像燈照佇黑暗，到佇天光，啓明星出現佇恁的心的時。20 第一，著先知，見若聖經中先知的話無通趁私奇的意思來開拆；21 因為未有先知的話對人的意思出，就是對上帝來的人，互聖神感動來講。

共同經課 - 4 馬太福音十七章一節~九節

1 過六日，耶穌另外帶彼得、雅各，及雅各的兄弟約翰，導in緝上高山，2 當in的面前形狀變換，伊的面光映映親像日，伊的衫白親像光。3 忽然，有摩西、以利亞對in顯現，及伊講話。4 彼得應耶穌講：「主啊，咱佇遮真好！你若愛，我欲佇遮搭三間寮仔，一間互你，一間互摩西，一間互以利亞。」5 伊猶啲講話的時，忽然有光光的雲罩in，閣有聲對雲裡出，講：「此個是我疼的子，我所歡喜的。恁著聽伊！」6 學生聽見，就仆落去，盡在驚。7 耶穌進前，摸in，講：「起來，莫得驚！」8 in抬目無看見一人，只有耶穌若定。9 落山的時，耶穌命令in講：「人子猶未對死人中復活，莫得用所看見的給人講。」